

Powšitkowne WOZJEWJENJA

njedźelu, 8. apryla 2012

Emmauske pućowanje

Na lětuše Emmauske pućowanje su wšitcy serbscy młodostni do Koćiny přeprošeni. Tute zahaji so štwórtk, 12. apryla, we 18 hodź. pola wjesneje kapalki. *Dekanatne dušepastyrstwo młodžiny*

Hłowna zhromadźizna Towarstwa Cyrila a Metoda

Předsydstwo Towarstwa Cyrila a Metoda z.t. (TCM) přeprošuje wšitkich člonow towarstwa, člonow sekcijow a korporacijow kaž tež zajimowanych hosći na swoju hłownu zhromadźiznu pjatk, 27. apryla, do Chrósćic. Započnjemy w 19 hodź. z Božej mšu w cyrkwi.

Přizamknje so zhromadźizna na farje.

Jurij Špitank, předsyda TCM

W Radworju pytaja kubłarku

Katolska wosada Marije kralowny w Radworju pyta za swój Katolski serbski džěcacy dom Alojs Andricki k 1. septembrej 2012 kublarja/kubłarku z džělowym wobłukom 30 hodźin wob tydžeń. Powołanske wuměńjenje je wotzamknjenje jako statnje připóznaty/a kublar/ka abo socialny/a pedagoga/owka kaž tež po móžnosći diplom w montessorijowej pedagogice (njeje pak wuměńjenje). Pisomne požadanja njech pósćelu zajimowani hač do 31. meje na tule adresu: Katolski serbski džěcacy dom Alojs Andricki, Nawjes 1, 02627 Radwor.

Štóž ma prašenja, njech wobroći so na wjednicu Móniku Bukowu, telefonowe čisło (03 59 37) 2 07 17 abo pisomnje přez mailku na andritzki.kinderhaus@t-online.de.

Oratorij „Nalěčo“ zanjese so w nowym „šaće“

Najrjeńša twórba z cyklusa „Počasy“ z pjera Handrija Zejlerja a Korle Awgusta Kocora – oratorij „Nalěčo“ – zaklinči lětsa přeni raz w dospołnje nowym wobdźělanju Dietera Kempy a Christiana Kabitza, kotraž zložuje so na originalny klawěrnny wučah Korle Awgusta Kocora. Premjera budže pjatk, 20. apryla, w 19.30 hodź. w Statnym dźiwadle w Choćebuzu. W Hornjej Łužicy předstaji so oratorij jenož jónu, a to njedźelu, 22. apryla, w 14 hodź. w Kamjenskej Marijinej cyrkwi. Pod wumělskim nawodom Judity Kubicec hudži orchester Sinfonietta z Drježdźan a spěwaja chóraj Bratrowstwa a Serbskeho ludoweho ansambla kaž tež chóry Budyšin, Lipa a Meja. Solistiske džěle přewozmu Susanne Thielemann, Tanja Donatec, André Khamasmie a Jörg Hempel. Wopytowarjo smědža so na wosebitu hudźbnu chłóšćenku wjeselić. Wšitcy zajimcy su wutrobnje do Choćebuza a Kamjenca přeprošeni.

Zastupne lisćiki za předstajenje w Kamjencu předawaja so potuńšene w předpředani mjez druhim w Budyskim Serbskim ludowym ansamblu, w Kulowskim Grofic wobchodže a pola časnikarja Njeka w Chrósćicach. Za džěci hač do 12 lět budže zastup darmotny.

Dalšej předstajeni budžetej njedźelu, 1. julija, w Praze a njedźelu, 19. awgusta, w cyrkwi Našeje knjenje w Drježdźanach.